



盧隱集卷五

東海高書孩之著

九日夕斲孝廉杜太學同諸文學招飲野墅二  
首

佳節登高物色新同心對酒勸  
鼎頻天清野迥寒臨  
洛月白山空斜照秦菊藥霜凝  
如傲客竹枝風動宛  
疑人白衣潦倒非無伴落帽依  
稀記未真

二

黃花白雁傷心節洛水寒沙不可  
舠雨擢千峯雲倒

出秋生萬籟月陰高他鄉留滯逢今夕勝地追陪復  
我曹百歲茱萸良會幾醉來長嘯首空搔

荆孝廉伯鶚過訪有贈

中原傲吏倦游遨佳士過從倒布袍忽漫風塵一歌  
哭居然天地兩荆高秋雲聚散隨踪跡落木蕭疎類  
鬢毛僂骨自憐慙尹喜關門紫氣爲誰勞

飲荆伯鶚靳以信分韻得開字

秋深雲物滿銜杯返照輕邀白雁迴天地二難逢把  
袂山川萬古有登臺辭霜赤葉禁時下滋露黃花倦

半開醉笑狂歌同一慨蕭條九辨是悲哉

野憤

三十六年秋高子居于號再睹燕辭壘感我留滯客  
葉墜洛水清虎鬪熊耳夕時物惕所懷山川察今昔  
峩峩入雲雪八月中天白牛羊懸蒼崖橫術帶阡陌  
其人或巢穴其俗無蓄積催科更復拙課殿甘督責  
十載曉吏事頑頓效涓滴折腰如尺蠖妻妾交不懌  
空谷幸無人內慙時耳赤間脂阮藉駕亦縱康樂屐  
庶少填委煩苟免多口譴四海仍小康 皇帝威咫尺

尺恭聞 聖節前臺省已滿百素畜本技癢觸義尤  
感激發抒在一朝議論孰準的意氣富指陳容易輸  
肝膈封事報寢多徃徃生彈射日見乞骸骨情詞各  
言劇跋疋諸大老不得施赤舄大小徃復理未解九  
六尼元氣寄碩果剝廬獨安適夫誰作厲階至今餘  
毒螫 天聽愈以高噐訟竟何益黨禍歷殷鑒賢者  
宜自惜爭亦羣小利危言徒喑嘖虺蜮與鬼狐影響  
襲其迹 國事視勝負秦越比肥瘠君子處嫌疑虛  
名中一擲是時警水旱留都滿飄幣又聞天有聲蕩

若風水擊頗覺蠢蠢輩萑苻互相索財詘力並殫威  
窮令或格腹心根本地難容針芒隙滇粵事既往效  
尤殆非策督撫異處置纍臣服巾幗災異何足論泄  
泄昧孽畫小臣妄解事忉怛內崩迫 天子堯舜資  
式瞻四門闢將順靡有終紛紜狗頗僻歸咎則無從  
釜鬻遂永隔乾坤氣日短萬姓生理窄久道無爲治  
詎淺 祖宗澤東西屢掃除名勒于竹帛婺緯誠過  
恤不敢不跼躅孤邑尚百堵流冗就襁襖絃歌猶未  
遑休養寬物役塲圃歲云晏青青荒隴麥天虛風動

山日翳雲變石啾唧聽悲號野陰起松栢潺湲澗淙  
流古苔漾寒碧聆空鷓鴻呼覽曠桑柘穢初衣違未  
遠牢騷結蘿薜鳳鳥一浪出鳴鴉厲相嚇巍巍太  
祖功百世可憑藉海內自清宴四夷安交易遼左間  
懷貳關通得米釋志飭樽俎上昊天明於赫君臣審  
體勢密勿或參席恭默邁商高解絃合因革突兀彼  
一時豁此窮愁癖

秋杪招荆伯鶚靳以信及三廣文飲統臺

病客登臺許再期孤城秋色晚離離河流挾雨寒呼

酒日落飛霞映奕碁郭外甘棠今日憇道旁杖杜古  
人思吾曹醉後能騎馬不獨山公倒接羅

伏承方侍御遣使相問志感二首

浮雲動萬里秋氣水一方美人不可卽曠如天河長  
思君浙江湄夢君漳水旁道里阻音徽而况無津梁  
空谷忽有人顛倒以傍徨開緘慰珎重明德勗毋忘  
玩比珊瑚枝佩若雙玉璜敦交信古處感之淚悵悵  
努力保玉顏我久寧參商

涼風拂枯桑千里一相思  
蒹葭照皓月未若兩心知  
游子慕所懽君子不遐遺  
孤鴻號天末音響厲且悲  
萬慮如糾絲參差安可治  
濁泥遠清波豈不悅同池  
天衢亦已廣黽勉後會期  
愧乏木李報一吟棠棣詩  
初冬野望

羣山榭櫟壓寒聲  
天地忽忽日暗生  
石出波濤迴蹴踏  
雲埋村落夾崢嶸  
三年涕淚松楸遠  
萬里關河虎豹驚  
清野悠悠樵牧侶  
江湖初服一含情

觀南橋成同僚佐

不日橋成歡利涉  
酒杯僚佐共從容  
河中淡蕩東西影  
天外峩峩六七峯  
迺照虹霓迴雁驚  
寒濤鱗甲動魚龍  
異時雪後騎驢跡  
好聽橫波寺內鐘

遣憂

喘嘑巖谷重寒雲  
白鳥沒掩映枯樹林  
墟烟暮髮鬢憑高覽  
四野萬象一消歇  
松楸半爲薪歲晚多白骨  
同時兄弟間而或化異物  
故人無一字空裏書咄咄  
才微恨不展天衢  
開崛閱事蹟類麾顏賦工薄  
弔屈漢道信遐昌  
四海想綸綍登用滿金華  
皇恩伸予

奪羣言衷諸聖仁者去黨伐劉向曉災異相如獨口  
吃嗟予聞 國體裨益寡毫髮課殿辱深罰尸素過  
朞月陰積窮鴟叫霜壓石流活賦詩鄙煩碎庶幾同  
心察

王郡丞母松萱殊節卷歌兼以寄壽

君不見倚天高高銅梁山岷江開闢流其間江流百  
折自清深屹石如馬砥柱心誰其似之淑人徐秋颯  
哀怨寡鵠吟庭竹染淚歲月古長松獨傲冰霜侵旻  
天指爲正荼苦甘如薺柔剛一知微豐儉多中禮猗

嗟母氏劬令子寔天啟不違熊膽勤必驗鳳毛體翩  
翩仕宦亦不惡陸機籍甚聞入洛駿馬長鳴向天衢  
一日聲名殷寥廓在遠遑及倚廬情逮祿苦思板輿  
樂豈無背樹憂可忘亦有西飛音堪託八十眉壽初  
期願未艾時健步却鳩杖紅顏映犀卮何用寄稱觴  
嵩丘三秀河之蘭又何用寄觴洛浦明珠雙玉盤何  
用問報爾青鳥與銜荔子丹又何問報爾峨眉初月  
積雪寒東海有高子聞之矢此歌天濶江長山嗟峨  
一年一度奈歌何

觀山圖歌壽劉封公

山鬼鬼雲容容紫氣暮函千芙蓉黃河萬里直挂眼  
嵩高二華當心胸雙飛白鶴銜蒼玉應圖來就浮丘  
宿劉翁七十顏渥丹春花掩映春衣綠熊羆鹿豕杖  
前過瑤草金光雜女蘿此地仙隱盧敖遠兼之遺事  
老聃多古寺悠悠散烟柳溪水桃紅迷渡口不應二  
女愛人間自憶劉郎是僊偶前年海上望若華親吸  
勞山五色霞只今骨髮益臞健笑騎玄鹿弄青蛇

冬夜

中夜意悄悄惕然如履霜反側增煩鬱彼美天一方  
噉噉鴻雁叫嘒嘒列星光房櫳時復鑿虛帷忽飄揚  
山靜轉多響百獸各有行糾紛萬慮集天地兩茫茫  
誰能守徽纆思從黃鵠翔

思古

四言  
六章

霜露初降寒雲在樹踟躕望遠側塞中路踈踏難言  
有懷親故忽焉三歲離棄墳墓違彼樂土就茲凶懼  
翩翩賈董被才所誤而我胡爲緯繡不悟登高振纓  
跂予長慕

廬隱集 卷五  
肅肅羣山蕭蕭洛川龍蛇深蟄松柏不言鳩彼鷹隼  
自獵霜天歲忽暮矣遠客歸還

謝公宦游長孺卧理顏闔鑿坏猶龍柱史古人出處  
各成其是熊羆首穴猛虎避餌兔罝之張鹿豕不邇  
薄瞻日華采采石耳願託北飛寄言君子

獨醒何益沉冥道朋河朔酒樽千古所稱穆穆公子  
陳徐劉應弭蓋西園文藻雲興糟丘鄴臺肉如丘陵  
斯人不作使我沾膺

有美一人在彼卷阿容如桃李被服織羅摻摻玉指  
揮拂雲和曲終三嘆俛仰悲歌飛蓬飄散白日蹉跎  
讒口謠詠憂思孔多

朝躋嵩高升乎少室遇一異人顏如朝日赤脚踏雪  
丹霞蒙密授我一藥三秀之實教我服食延年却疾  
輕舉御風晴髮如漆攜手浮丘王子爲匹吹笙騎鶴  
緱山自出

冬日漫題

洛流百折萬重山一片寒沙返照斑烏鵲飛來迴鐵  
嶺青牛歸去自函關蹟遺神禹看疏鑿祠有宣尼憶

轍環天抱黃河秦晉外日吞滄海鷺鷗間冰霜晚歲  
冥鴻遠蒼莽空村牧犢還留滯史譚猶寄恨哀傷庾  
信杳難攀小齋懸榻琴書靜野市垂坊米豆閑三十  
一官聊嘯傲朔雲枯木對愁顏

雪

緒風朔雪飄飄至千里孤城對北邙落日關河俱湛  
湛同雲秦楚一茫茫巖深迴穴熊羆跡天遠淒涼鴻  
雁行悵望人間時雪涕歸期又負向春陽

復大雪

積雪蒼茫虛室輝寒林掩映擁柴扉蕭森天地聲逾  
急澹蕩江湖影忽微却憶梅花何處發漫嫌烏鵲向  
人飛銜杯徒倚歌招隱疑帶山陰明月歸

雪後同僚佐號臺隱眺

萬嶺迷回積素酣高臺對酒一抽簪野昏逼席天狼  
過地僻窺樽夜鼠貪村井風生叢竹外人家月翳片  
雲南興闌車馬衝泥返醉覺陽春曲裏涵

鷄鳴篇

鼓角落層嶺雞鳴巖城動悲憂夢寐間悄悄迫危恐

雪明納微隙風噫號萬孔昧日警夙興千慮紛填擁  
我夢父伯勤怵然軫先隴狐兔隣闐寥封樹或已拱  
時平輕出處道貴遺辱寵大臣恨維谷至今痛作俑  
一令在海內稊米何其冗汎汎欲安適羣情正洶湧  
浩蕩從吾願庶接巢由踵

雪陰雜興

晶膠莽四野引睇晃無定閃爍漾寒林枯藤一何勁  
琴書帶幽室虛白媚餘映陰霽爭儵忽嵐掩青霞競  
闕寂見天根後凋存本性垢淨非所云冲約德之柄

庶遠鹿豕踪而多狗馬病日歸定曷月翛然激孤詠

二

歲暮霜霰交猗猗冥鴻迷洛水飄練光凍沙折大隄  
登橋無驢騎梅花帶遠蹊山川此窅奧彼美隔金閨  
栖栖裋褐士睠睠同袍睽西氣揚哀缶猿狖間之啼  
隕景嘆逾邁今古將何稽

雪霽行香寺飲集

芳晏幽期好數尋天花縹緲淨祇林輝輝殿閣含雲  
物默默山川待古今蒼蘂娑羅俱玉樹趙箏秦缶總

潮音誰能留雪經晴望到夜陰融酒氣深

至日

冰雪淹長至灰浮玉管深風雲看驟變天地恨多陰  
勿替微陽慮應知七日心荒城一登眺萬竈夕烟沉  
積雪行

玄雲十日結巖風積雪莽互天地同重續無溫鑪不  
紅墮鳶翅凍鵝鶴叫寄矣我輩奈彼窮  
黃霞食日吞復吐層冰及軋山木苦柴門竹屋行豺  
虎旋敲冰筋煮草根哀哉誰子淚如雨

陰山玉關太苦寒斧冰谿谷爨馬鞍指僵骨斷空長  
嘆而我僻遠免旁午居者不憂行路難

冬深六首

雪後江山寂登臺接渺茫黃河自今古大地忽低昂  
宦薄身名外時危意氣旁艱難臨歲暮感慨寄耕羊

二

鳴泉鳴不息出沒日光華山代秦川遠天連汴樹斜  
嶺猿攀斷木關雁折悲笳何事傷心地乾坤正一家

三

昨過雙泉寺天風颯萬川聲傳清磬底寒動暮幡邊  
虎渡前溪雪鳥棲古樹烟暫游聊一記誰繼此幽偏

四

寂寞依雙樹蕭森對數峯浮雲低望嶽晴雪遠聞鐘  
陶冶詩篇在經綸世代從 朝廷滿封事切責有司  
共

五

饑年獨惆悵他日愧何如扁鵲憂却走元龍高自居  
中原迴睥睨卒歲惜屠諸萬事牢騷久偏矜貴子虛

六

枯木生淒籟寒松結凍雲麝香時一過麋鹿晚呼羣  
井邑類如掃 廟廊多未聞紛紜好議論持以答  
明君

讀王新建遺事感述

新建秉神照幾先洞觸物批鱗抗矯節翻然遠羅罽  
迨乎誅逆師動如雷電疾計掩戶牖奇間奪安平密  
當時無知者何由信乘筆讒慝煽颺興全身在仁哲  
几几赤烏忠赫赫汾陽烈功成幾不賞道大疑詭實

聖人弘采納酬庸特昭徹俎豆異代延帶礪通侯列  
漢恩固非少感激壯心熱一為雲龍行三嘆良未輟

雪後山行

積寒水載塗我車屢稅鞅素華半融濕變化隨萬象  
列峯皆刺天迴穴互相黨離猿攀枯木駭熊擲落椽  
野火忽一點虛籟傳眾響圓然霜氣嚴庶稍避魑魍  
覽時悲滯留臨睨增恟怙聊當游廣莫千古暢蕭爽

和傅元鼎嵩陽十八詠

嶠嶺

二室中分豁一門岩堯萬仞上輾轅千秋輦路生春  
草不待啼鵑已斷魂

盧巖

太室東來第幾峯孤巖側削半芙蓉親看飛瀑三千  
尺直透春雲一萬重

少室

八百餘疊涵崔嵬三十六峯天外飛寒巖別有達摩  
影時帶朝霞終不歸

嵩月

嵩陽宮外碧雲輕秋色年年月倍明騎鶴僊人來往  
地知他何處試吹笙

箕山

幽壑虛嵐太古春前賢遺跡棄瓢新枕流試訪巖棲  
者或有當時洗耳人

潁水

潁陰春水抱城阿穀雨朝時布穀多縣尹勸耕車遶  
雉飽聽于蓑野童歌

中嶽

古祠雲氣翠華俱想像千官玉帛趨松栢卽今風雨  
夕依稀猶似聽三呼

少林寺

玉殿森沉覆古藤千年聖諦識傳燈不知三秀花開  
落閱盡袈裟幾代僧

石淙

風雨他年上巳時石流澗潑酒觴遲但看應制唐人  
句無讓蘭亭數子詩

玉溪

春流窸窣漾迴溪彷彿桃紅客更迷時倚晴雲一垂  
釣石羊關外午鶯啼

雲洞

吞呷陰森古洞深紫雲蒼莽一龍吟幽探時擬看神  
物風雨茫茫不可尋

星臺

成周卜洛萬年開彷彿天中百尺臺圭刻遺形人不  
識猶傳絕影日邊回

秦槐

獨樹祇園歷歲華根柯百畝影龍蛇游人多作三生  
夢時逐海檀落細花

漢栢

參差三栢插天中蕭颺長鳴漢代風下馬徘徊還下  
拜離離麥秀滿遺宮

鶴觀

王子吹笙月滿庭丹霞隱映日雲青萬年仙觀留芝  
檢傳得浮丘相鶴經

熊山

縹緲熊山五月寒中天積素倚巒岈分將羣玉峯頭  
色一半峩眉頂上看

九潭

空門漠漠白雲還雲外春潭鏡裏山獨有鉢龍眠不  
穩時來行雨到人間

五渡

產九節菖蒲

僊源圓折抱嵩流石戴菖蒲一萬秋漢主可憐僊骨  
少封中只有白雲愁

余嘗游嵩若嶽嶺則所經行者也嶽祠少林則所信宿而旅禮者也盧巖曾午憇之矣秦魏漢

栢亦所手度者也其他諸勝則見于元鼎之記述而已然余以嘗望之聞之若可想像在目昔聞語長安者猶發西笑况曾掛眼二室之巔哉余詩不逮元鼎乃不為無徵方且倚和章圖後游庶幾余附元鼎之遇山靈不誣矣

官署同姪若駢守歲

除日迎春喧入夜椒盤綵勝一燈斜關河骨肉三千  
里天地雲烟百萬家擲去年光如舊曆看來宦蹟總  
空花歡娛寂寞愁分汝故遣清樽謝鬢華

元日立春

上日淹留感歲時立春雲物入相思梅花索笑離離

放綵勝迎歡細細欹軟藉東風和短髮融隨晴雪映  
游絲故園淑氣遲應未對酒酣歌淚欲垂

人日雪

中原節候正臘破又經旬人物陰晴日江山雨雪春  
書雲聊有紀傳菜獨無隣薄宦親輿隸他鄉且任真  
上元客夜是日自洛西馳二百里中宵抵長水

鎮作

佳時迫于役奔迸驚西邁朝發澗流駛夕濟洛東派  
潏潏蕩春波泫泫烟霧會晝風眯倦馬暮景豁氛晦

燈火紛曄曄奪月光炯碎燦若小星燭村墟互向背  
鼓笑聲相聞殊俗殷報賽遠途雖寡歡解顏慰愁憊  
緬思兒童歲一逝未不再少壯正可追草草徒深慨

早春

中土青春早朝烟四野耕游絲晴漾影融雪晝聞聲  
見日微虫啟知時好鳥鳴支離倦無力曉睡重如醒

二

青崖忽映帶碧草欲勾芒清淺黃河外虛無少室旁  
氣蘇春眼煖陰釀早雲香正月憐新雨祈年興甚長

三

一月三行役青春好折腰輪蹄慣煩殆風雨忽飄颻  
趨走從人世清狂賴 聖朝悶烏棲獨柳掃拂最長  
條

四

馬行雲氣上人醉夕陽中沙草分波碧山花藉日紅  
洛妃嬉細雨秦女倚微風于役聊開暢征車况指東  
奉寄李岷嶠中丞遼陽二首

遼陽鐵嶺散胡羣節鉞天山萬里勳霜雪氣寒玄菟  
月旌旗色變碧蹄雲輕裘共識羊開府絕幕應卑霍  
冠軍當宁正勤疆場問好將肝膽奉 明君

二

鴨綠江如開府清山河肩背擁神京句麗視漢左馮  
翊李廣防胡右北平庚癸久聞征戍苦金繒未厭欸  
夷情 朝廷屈指諸公在不許書生浪請纓

二月復雪

西雪二月盛春陽喧更清霏霏下雲影泯泯入風聲  
書籍有餘事江山無限情野桃白花早歷落雜飛英

廬隱集 卷五  
春雨未寧道上

車馬春來數風塵遠自憎虛嵐時一合濛雨忽而升  
野竹深俱暝幽花晚獨疑怡情扶倦骨相失對平陵  
古憤二首贈傅元鼎

燕趙聞豪客國士殉所終主滅自戕形妻友竟相蒙  
刺趙至再三斬衣一何雄揮劍四五躍白日昏沙風  
至今遺橋上往往貫白虹流水揚哀響聽之使心忡  
誰謂古人遠長歌激深衷

二

聖有不必達狂有不必耻智有不必生愚有不必死  
烈士苟信心六合安足擬汨沒一世間營營醯雞爾  
時平登腐豎急難或吾以神羽怕久籠轅駒望千里  
褰裳欲何適作者幾人矣勗諸毋饑渴海內有吾子  
後游靈山偕列縣尹

山寺羣游再春光破寂寥面迴清洛顧背却遠嵩朝  
竹栢鳴風葉松蘿裊露標擊絲揚苦調燒筍飮同寮  
蜂藥當尊掠鷺枝趨席招嘯歌真自得酣宴轉無聊  
澗草芳菲合源花仔細飄歸途燈火夕浦岸漫相邀

龍蟠寺

竹谿迴入崦杏岸背尋源蕪沒龍蛇寺幽偏燕雀村  
斜陽春醉眼流水客銷魂杖屨時堪共江山自不言  
野蜂衝酒過嬌鳥觸花喧斟酌憐羈旅東風似故園

金牙山瀑布

在宜陽縣東南十五里土人祠樂巴爲邇其墓云殿樹著黃泥枝柯到顛久不滅沒亦異也

背郭東南谷旁溪三四家巨靈親劈石瀑布遠飛霞  
影折飄空絮聲吹破浪花樹泥龍昔鬪蘋瀨燕新斜

別汭聊旋馬陰宮必伏蛇游堪當山簡訛久指樂巴  
落日銜孤岸哀淙嚙淺沙蒼茫入羈思留滯獨長嗟  
同元鼎步宜陽西郊

長日休無賴春風奈肯忘招攜知幾許爛熳爲誰芳  
細草侵衣潤飛桃逼酒香蛾兒嗔蝶燕子戲鴛鴦  
畦麥村村似園椒箇箇行樹根頽睡卧花藥插顛狂  
步屨時人怪流觴往事傷郊垆生遠思瀟灑憶滄浪  
借元鼎露輿行嵩洛道上

方駕春花內青袍照眼新僊才俱不世吾道孰能馴

雨裊垂絲淨風翻落葉勻烟墟舍白羽漲岸帶青蘋  
玄鶴瞻緱氏明珠贈洛神乾坤三月麗山水兩心親  
羣鳥還求友雙龍怕近人五噫去梁子百譚滿陳遵  
矜誕論文日幽偏種藥春好尋梅福跡時事倍沾巾  
後游少林寺呈無言道公

衆山趨少室古寺帶深堂日奪三花曜泉飛五乳香  
龕燈懸縹緲寶塔半低昂苓朮精靈久松杉雨露長  
摩尼侵隱映梵鐸毀澈茫石壁人間有金田異代荒  
千秋聖諦義萬丈白毫光藤葛春俱蔓雲霞遠益蒼

跋陀啟檀越惠遠擅蓮場三笑從茲去同游耿不忘  
馴禽疑解語伏虎欲相將莫更憐桃柳風前劇太狂

### 觀星臺

臺在陽城南前有測影石  
圭周公以定天地中者

山豁陽城內雲涵潁水東觀臺銜睥睨漏刻隱蒿蓬  
泉注丹型舊銘湮石墜同風雷遭忽及天地劃當中  
禮樂繁周室星辰擁漢宮登臨美人思今古慨無窮

### 石淙同元鼎脩禊事

衆壑開穿出飛淙偏側斜勢吹星宿海聲折斗牛槎

天后摩崖古羣公麗藻賒蒲茸生玉髓石乳帶芹芽  
濯足滄浪濶醒心碧落華車廂亦有谷衣帶若爲遐  
上巳欣和暢名賢足怨嗟傾壺臨險久惆悵渺雲沙

張魯山解邽縣招同諸寮友飲望嵩樓

危樓遙碧俯虛岑風雨蒼茫天地心嵩嶽暮涵周甸  
遠汝墳春動召南深當窓凜入龍蛇氣倚檻寒生虎  
豹陰僚采可忘今夕酒繁歌急舞欲沾襟

小寒食發汝州

霧雨爲寒食風塵未改衣折腰春向暮回首興多違

雲物低哀壑松楸掩落暉紙錢烏鳥奪沙步鶴鴿飛  
伊汝行相及崆峒望忽微鞦韆猶士女鞍馬豈光輝  
麥秀流亡屋花明閭寂扉幽淙轉石苦叢薄斷烟稀  
疣贅身何益支離淚獨揮驅馳勿復道飽聽不如歸

初夏省農示父老

萬峯虛碧撲衣裾春雨東郊勸稼初太史舊占鳧是  
鳥郎官真有雉隨車時聽耕鑿民謠內見喜桑麻帝  
力餘鄭重甘棠慙父老褰帷問俗意躊躇

水峪

水峪二十里縈迴沿復通  
嶄巖雙壁絕開闢五丁功  
樵牧烟嵐外牛羊薈蔚中  
石橋披澗葉藤岸覆沙叢  
宛轉武陵路陰森河伯宮  
嶂屏逼日月谷隧聚颺風  
蝙蝠含靈白獼猴中酒紅  
潺湲真洗耳林薄屢卑躬  
鍾乳丹時液松脂露併融  
午鷲山應合野鼠穴棲工  
藥草無人識桃花客未窮  
不關候函谷何用問崆峒  
雨氣侵浮晝天光漏鑿空  
丁丁聽宵雷濯濯隱丰戎  
棧接千章入溪明一鏡同  
翻思葛陂杖恍似對壺公

乾澗

湫流九里澗上下接春溝  
虎豹荒哉過蛟龍逝矣休  
難窮隱見理遠歷古今秋  
沙白天俱永雲青地迥浮  
野叢鶯睨睨苦竹鹿呦呦  
屋蔓藤蘿怒墻花蜨蝶愁  
葱菁紛刺眼風雨莫回頭  
陵谷人間世乾飛惜寡鷗

抱犢山

侵曉沿溪絕躋危陟巘頻  
空青生履襪積翠洒衣巾  
響墮猿攀石啼聞虎咬人  
風雷迷閭次嶂岫鬪嶙峋  
開闢茲山有登臨一望新  
伏牛看不見抱犢具同因  
洞壑天門窄陰陽日馭均  
神芝雲霧秀大樹薜蘿春

雞犬遺仙藥松杉著野燐石華千歲戴崖蜜百花勻  
白鼠飛俱躍黃熊狎忽嗔卽妨驚帝座莫更問河津  
縹緲烟霞體悲愁血肉身虛無疑可到呼吸逼星辰  
雨中招飲韓郭兩生

夏日可憐雲不開冥冥陰氣擁高臺却行寒谷千靈  
雨暗碾空山百里雷紫燕懸巢將子過神龍揆窟背  
人迴見愁在野歸難得樽酒淹留二妙才

苦雨阻樂川三日望景山不得至

陰氣夫何極寒蕪渺無際天地一莽互雷雨屯以閉  
怵茲麥秀初歲功關匪細浸淫三日夜眼前舉蒙蔽  
泫然杖杜枝蒼菜交相翳山館闐凜列屋漏仍留滯  
頗隣狐兔宅親見蛇虺逝苔衣及壁竈履綦易軒砌  
神女不自持霏霏濕羅袂腰肢旋柔風朝暮紛搖曳  
瞻望彼崔嵬瑤闕儼天帝色飛拄杖巔玄黃大恐泥  
蕭蕭伊水波石流轉深碛津梁失南北塵鞅竟焉稅  
尚眷薜蘿長進退兔維係川廣越一葦飄颻渺根蒂  
日晏鳥獸叫內熱忽出涕

樂川久雨向夕微霽望景山奇幻如畫作示諸

子

雨徹仍聞響烟開稍斷陰雲根忽出入日窟迴浮沉  
 峯勢胎簪秀嵐光疋練深紅飛將夕燒翠滴後春林  
 尺五天俱逼三千界可尋妙香聞爨火虛幻應潮音  
 陪從諸生意棲遲靜者心孤槎伊水湧淹泊到如今

盧隱集卷五

盧隱集卷六

東海高出孩之著

登景室山賦 有序

王子年拾遺記云老君居景室之山與世人絕  
 迹唯老叟五人或乘鳴鶴著羽衣共譚天地之  
 數所撰經書垂十萬言時浮提國獻善書二人  
 乍老乍少隱形則出影聞聲則藏形時出金壺  
 器中黑汁狀若淳漆灑木石皆成篆隸科斗之  
 字記造化人倫之始老君所撰經皆寫以玉牒  
 級以金繩貯以玉函及金壺汁盡二人乃欲剗  
 心歷血以代墨焉此乃洛州景山太室少室也  
 茲其說大詭幻邈漠矣然景山載賦于洛神而  
 不甚著于圖志二室標勝于祗林而絕不顯于  
 玄跡疑景室他自為一山不必洛州也余至盧  
 氏聞南境有山巍峩際天俗傳為老子之居即

老君名之越二歲余以間登焉則頽崧高瞻太華臨中條際玄嶽金臺玉闕之遺丹竈瑤函之闕不可殫述又茲地寔在洛州之西函谷之南仙真之接跡名山之奧蘊不其在茲歟因憶子年記語易以嘉名兼之賦頌庶今後觀焉

偉茲山之夙岌以靈闔兮蕩北塊混沌而騰越首終南而尾泰和儻峽峽邈碕於荒芻芻風雲奔汨日月碾礧礧今嶒嶒岸嶺塌彼虛耶中類有物爾其真形也苞元氣入無間立中央衍赤縣決莽蒼叢依天轂轉芒兮芴胚兮孔瀕浮溟滓沒出鴻濛斯又人物之同所生而太極之所總統也爾迺商洛經其隈

唐鄧緯其足襄漢牽其如帶崆峒頽乎奧麓徒觀其渺聯溜澌吐吸陵谷會沓互倚冲融溢目殆有軼于前籙難以殫告者焉屠維之歲正月重巳余弭填委企其涉止遠陋存想近希曠視擢巉嶮以側驚軋踵肩而附行徑漫漫之宛蹊跨蜎竦以爲梁羗累趼而離頽坐碧草之苾芳軒赤源于沙岸愧明珠之燭光超凌虛以髣髴拔絕澗拄乎幽篁飛雲布下仰不見天泉鳴地底空濛澆然林薄輪顛磴磔虛響殷雷宵奮金沙沉爽隱粼燿爚鶴笙來往歛不知其所之如

均鈞天之想像也層岑巖峯今入于廣朗同天一氣  
今不得階上徒倚藉慨爰獻以歌顧望四方其歌伊  
何一歌曰中條躡腕今冀方王屋嚶嗟今雲房峭函  
今爲梁安得挾北風而翱翔二歌曰瞻太華今蓮峯  
蘊金天晶今白帝肅毛女今如玉願言攜手亂心曲  
三歌曰維南武當今參差雲華帝靈肺今太清家素  
氛今紫霞願隨朱鳳今巢彼神阿四歌曰少室今粲  
業擘神芝今華曄曄食之不老更千劫緱山可升頽  
可涉嘉茲靈之中處揖四旁以覘履絡坤軸以奠區

甄無形以通氣彼熊耳岬嶺之咀伏牛丘隅之異甲  
爾羅朝豈稱軒輊哉而亥步莫窮禹標難至故名昧  
于野俗事闕于載記者也若乃網緼曠曠維夜將半  
况天雞以有聞逆搏桑之輕翰啟將旦而未明倏的  
爍而曼爛揭揭焱焱少焉落散亦或朱曦焯焯赫赫  
稜霧赤鳥奇足仰捫日馭摩崛吻而軋戛隣掩襲于  
高樹奄才于乎細柳窘及靡橫選而不去又有素靈  
猗難望舒聯媿魂芾芾騰倚碧端風颺颺今在下  
唱喁喏之殷然葳蕤雲姊盼睐不言曾不可乎少留

竦纖厲而生寒于焉青鳥雲使玄蛇風生雕虎嘯陰  
子規啼晴猿掛弱枝鼙舞絕陁魁窺人其冥笑熊驚  
透而駭聲狙麇攫父狻貙獠夔謝豹羞首獼猴相追  
九尾之鶴四足之鯢逆毛毳毳如嬰兒豪豬飛而  
四射杉雞介而不移于是神松柯礪靈藥蕢翁琅玕  
璇英之木玉禾金粟之種蔥蒨菝葜棗槲榔從無名  
羅生谿谷敷華離芷射干芬菱檠娜鷓綬錦帶獨活  
舒荷青泥綴乎藥葉灑露零兮條柯爾其陰則凍壑  
剝崦澹沲陂陀轆轤礪礪窅窅無人家虛牝縹碧玄冰

峩峩素雪林立上冒芳葩冰蠶幻文而獨繭雪藕順  
風而呈華其陽則丹梯礎研翠屺岵嶢嶢璆磬琤奮  
聳神霄瓊精灑瀉燐熅赤膏榮木衍溢之脂綠葉冬  
秀之苗霞標暗度而彌阪雲岸絕曳以陵椒迺有玉  
虛之隣紫府之賓羨門松子之侶洪崖叔卿之倫驂  
鸞馭虬或乘赤麟咸倣儻而幼眇來左右乎聃君著  
玄牝之冲魄殫天人之闕文孩億萬之耳目薄仁義  
之聖論矯神龍其不見徒盱衡于歸雲蒐逖載以徊  
翔想丹漆之靈詮喟五叟以胡勤存十一于百千瀝

赤液以洒翰汗金簡之微言彼二童其已坳喟人棺  
之上天魂飛爽其如覲望瑤臺以泫然於是青羊返  
駕紫氣黠黠虹梁霞眷翠幄嵐掩聆環佩之虛無矚  
樓觀之剡灩踐石磴將懸蔓今庶幾獲寶笈與芝檢  
翳崦嵫忽其雨雪增浩嘆而顛頷佇蕭颺以荒愬諒  
彼此之無厭余迺宿通天之宮倚瑤房之樹斲石髓  
酌玉乳奉萬年之栢子挹三秀之玄露樵者迺指余  
以昔人遇仙之所眎現金光之處俛迷旋失莫知其  
故茲夕假寐倘愆有遇方瞳紺姿燿熠嬰孺曰我谷  
神觸虛動寤精駭魄奪來耶以去二儀汶汶如中烟  
霧自顧腥腐令心恐懼屬怙悵以待瞰眺龍門其已  
曙遂惘然于秋駕然後知失景室之所寓也

景室山三十韻

溟滓中天矗遙隣五嶽尊空明旋晝夜泱泱俯乾坤  
枕帶朝千里坡陀壯一門巍巍奠秦楚鼎鼎接崑崙  
蒼筤青相射開通碧忽吞躋危捫斗柄望遠入河源  
陰火吹風著陽湫浴日溫玉漿凝露掌石笋拔雲根  
融結諸靈合虛清萬象喧子規芳樹夕山鬼女蘿昏

雨雪分人世松杉謁帝闈無名花欲笑希有鳥如言  
翠駮緣階跡豪豬對席蹲攀援矜狄鼠騰倚學胡孫  
霞起羣真會雷搜百怪奔當時占紫氣太古闡玄元  
偃蹇雲旗剡歲蕤羽蓋翻漆書垂秘檢金笥閉題痕  
蚪斗藏丹字蝦蟆吐赤暎流沙後遠適函谷絕高論  
幽室留鉛井仙童引絳幡青牛不可見白鹿至今存  
五藥深春秀三芝返照暄雜英香互襲奇石髓能繁  
問道嗟何晚辭家矢勿諛黃庭繙寶笈碧落動飛軒  
郭璞終非死平君尚待婚清都遠腥腐下界自丘樊

地沒鼉龍窟天陰虎豹原塵襟一回首悄悄黯精魂  
景室山晚宿郭生延祚韓生上侍聯句

中天開寶域萬象湧琳宮

出

松徑寒新綠霞林笑晚

紅

延祚

陰森浮日月縹緲入伊嵩

上

冷壓琪花雪香翻

玉藥風

出

乾坤歸沆茫殿閣接穹隆

延祚

向晚陪幽賞

靡崖興未窮

上

長春觀

春溪清出谷仙觀曲藏阿古洞交廳鼠幽巖罨薜蘿  
菁葱珠樹曉繚繞玉禾多繫日丹庭影迴雲紫府歌

風淒凋虎近草偃白蛇過家本蓬萊侶游踪奈客何  
山行徃復記述所見得二十韻

劍屏石名  
箭嶺山名

露冕循春野東西訝屢更他山疲應接遠水弄深清  
逆折星源影高廻瀑布聲盤渦觸石碎斷柳轉橋鳴  
淺瀨根風雨靈湫變晦明漢濱人不見阿谷女相驚  
日氣霾松榭泥香散芷蘅古藤交碧翠雜蔓細崢嶸  
似有金光草親奉玉樹英青禽邀作使白燕舞還迎  
萍葉思丹實蘭華戴紫莖崩泉飛岸圃返照帶衡荆  
欽碓山君坐頽牆木客行劍屏侵路出箭嶺入雲橫

林合蚺常吼田荒鳥自耕天邊宿霧露地底漏生成  
鼯狄翻何捷熊羆亦至精芋羹歌野叟麥飯進村氓  
四月桑蠶候千秋竹馬情漫書游豫事仙令舄鳧輕  
擊鹿行

雲石崢嶸山蒙密嶷嶭雜樹日西出野人卽鹿薄往  
觀高蹄迸落爭足疾落落張且近遠中緩驅急脅馳  
驟同合圍指示莽不辨巧遮奇護狗有功卽論狗功  
不讓人追踪要飭捷如神奔走無聲聞洶湧權奇若  
思微逡巡羣趨戢習驚還立戴角當頭頗審集爾鹿

亦應慎所從不然罔咎何嗟及駢死那能復擇音風  
雲改色天忽陰刳胎覆孩王聖戒違時恐傷造化心  
遄歸欲雨樵父送回首恍惚隍中夢荆榛的歷露水  
多百年此地難重過吁嗟鹿兮奈爾何

聞閃允修被口作此寄問

朝廷何鼎駭江湖一滌蕩咄咄吁可怪悠悠安稅鞅  
封事頻勸歸歸人日鹵莽賢哲嬰世患寵權或在掌  
金門避地客點染得無枉鄙心億則中告誠猶影響  
天運默驅使君子果亦黨慎莫輕掛冠高名怨其上

處身智愚間不貴遠羅網春深燕草綠游子思養養  
風波匪失據飄飄五湖槩山縣青崖雨隱几烟霞朗  
書札繫離索興色飛長往庶幾相與俱蒼然有泚頽  
時危出處變吾輩富清賞天涯從此阻百年同悅悵  
聞允修在告出都念富道洛便會回有期聊作  
志快卽圖迎寄二首

去國翩何急春蕪萬里青憐君感時事將母別朝  
廷函谷來真氣黃河候德星天涯待傾倒細倚慰飄  
零

二

拋書問空谷得報怪清朝歲月中原杳江湖百粵遙  
果哉猶不易作者好相邀會面三年濶還愁轉寂寥

五月省野三首

僻地連山迥薰風進雨涼人家蠶日永野圃麥秋香  
戶網藤蘿翠園籠杏柰黃寡民來往少建德是何鄉

二

中牟殊不異葉縣亦徒瞻烏鵲迎高蓋蜻蜓落短簷  
凌虛森屋角返照在城尖父老看淳朴都忘爾汝嫌

三

山頭何代寺寺內百年燈石伏泉衝虎天虛月伴僧  
鶴棲甘露樹鼠齧古烟藤身在餽餉境忙官笑自憎

五日觀大淙飛瀑

令節追尋遠奇淙偏側看虎符驚數見龍窟怕深蟠  
流沫千尋迥懸澌百丈寒鳥鳶迴不及魚鼈近難安  
競渡陵齋汨奔空圻瀨湍徑偏披細艾浦淨帶芳蘭  
泉客疑來獻湘纍獨少歡沉圭憶曾祝風雨忽漫漫

五日龍喜寺諸生侍酌

山川地一隅雲石寺偏孤佳節諸賢侍無名遠壑趨  
龍津飛綵縷虎穴避文符施食皆分黍傳觴獨嗅蒲  
詩篇爭奪錦簫鼓敵呼盧栢子青初結榴花艷自扶  
雜香融石蜜忽冷迸泉珠何處生雷雨飄蕭別思徂

雜謠

拙者能役巧少者莫嗤老一日長營營百年皆草草  
凡人有貴賤萬物無醜好造化亦胡然多知徒自惱

二

道豈揚而清人豈同而濁休將死虎鬚寧拔生牛角

苞桑久一繫碩果猶恐剝傳與世君子防身孰周渥

三

過中慎莫焚失利慎莫裁多門無畜知晚季無畜財  
朝野日苟且虛名罪之魁不見晉潘石同歸已焉哉  
送別王靈寶之安慶郡丞

寮案情何極天涯判袂中不堪雞犬境遽作馬牛風  
望遠桐陂月懷人皖水楓南天有過雁書扎到江東  
夏日謾興

炎天蒸草樹晴日有風雷寂寞文章口謹譁議論才

久辭河朔酒高卧號公臺長嘯亦何適解嘲歸去來  
聲名爭有託寵辱未無媒續狗憐搖尾枯魚尚暴腮  
潭潭私結舌悄悄隱防胎周孔復誰作松喬安在哉  
皆爲造物役更被聖賢咤生死如流水乾坤幾劫灰  
冷含歆玉簟香切酌金罍神雨飄時過山虹劃忽開  
齋衙樊薜荔琴劍浥莓苔案土揮仍落隣烟惱不廻  
蛛絲當戶集蜂尾隔簾猜膩汗沾皮重繁眇入眼摧  
蒼蠅真觸忤乳燕對徘徊宜踏陰山雪難忘遠道梅  
江南庾信賦渭北少陵哀竹愛新栽杖荷思舊舉杯

靈龜傳洛浦銅雀憶漳隈吏隱他年事踈狂自古災  
榴花暄屋壁葵葉帶梁恩萬世惟龍比伊人繼馬枚  
浩歌掩雙淚終是任恢恢

潭音沉

夏夜吟

長夏燠熱草不肥昏黃營營蚊蚋飛遠山晴電時一  
閃平野小星還自稀米紈竹簟不能睡臭虫無媒紛  
而至晝伏夜動頗蠢蠢乘高據屋繁氣類誰其助虐  
蚤與蠖公然跳走百無避對此撫枕太息天將曙攬  
衣行起欲何去

七夕立秋

三度周南夕秋風不肯饒飄零憐雨別聚會惜星遙  
蕭瑟梧桐樹虛無烏鵲橋悲心逐洛水日夜自東朝

二

晚涼瓜果席微雨萬重山雲淚零香粉天風斷佩環  
病偏增客裏秋又到人間苦羨懸巢燕霜期准擬還

雲漢詩

皇矣瞻雲漢下土具所依七八月間旱白日燁毒暉  
觸石焦欲裂赫林氣忽微草木被炮烙信此昊天威

雌霓如長蛇經天亘山崖西風一飄散屋舍宿妖霾  
百姓夫何罪秋成色已饑官宰恧職守飽食理豈肥  
方圖解佩綬悔遲不早歸今計則不可寧忍棄灾黎  
吞聲莫告訴天人同一時

哭趙五孝廉汝晦有序

趙君名文燧與余同鄉舉遂兩申婚姻之好皆中絕不諧方期再盟今已矣夫君警穎絕世不修禮度精老莊之旨遭際荼怪憤邑歿世年僅三十三無子行路悲惻而况于余哀可知

哭君空噉噉雙淚落東流弱冠追隨愜同袍臭味投

親知回首盡肝膽此身体颯颯秋雲暮哀猿入客愁  
二

此兒人不識歸去定休迷蔡氏遺才女任咸有寡妻  
逍遙游已化滑稽物堪齊望遠還哀郢蒼茫海日低

瘞二鳥行

官署蓄一鸚鵡一錦雞皆不樂離籠之養展  
轉愁病錦雞春沒鸚鵡秋亡命童子瘞之作

詩

客鳥隴右鄖山間來自萬里近亦千關山阻絕天邊  
烟鄉樹一別忘歲年本圖毛羽充君玩翅膠尾秃空

蒙憐學語呼名借顧盼閒婢嬌女色成妍家雞側腦  
遲相向野鷗偷眼雲霄上病骨支離翼尚騫旅魂迷  
復神猶王區區梁稻非其情墮落低垂空引吭聰明  
文采祇自崇死脫雕籠得踈放春花夜月杜鵑啼秋  
霜赤葉鴻雁饑有飛當附西歸翮化物或隨丁令威  
生不及支公鶴又不及右軍鵝棲託華署樂奈何爲  
君一涕仍當歌天風日暮山之阿

秋日

羈艱又三秋聞見等一悲况值早酷餘勞人早生離

時事同慘淡雲物會于斯衰草泣野露稀疎如鬢絲  
轆轤卧廢井砧杵鳴相思罷民皆草草生計豈支持  
高鳥翔萬里遠彼弓燉危稻梁諒匪謀崩迫獨朝饑

遣遇

公庭諍詞稀白日亦多閒驚飈走黃蒿倏過萬重山  
丈夫豈無豪不在杯酒間命駕恣所適薄暮慟哭還  
還則美婦人兀然憑厚顏嵇阮皆已矣干柳樂閉關  
潘生媚賈謚胡校巧拙煩滔滔固如此歸去復奚言  
秋日檢理歸篋戲作誹句三首

孤城八口只依然三十來回月影圓書篋固應無長  
物還餘千日杖頭錢

二

公田種黍愧陶潛乞食歸來太苦廉不分折腰甘十  
載輸他酒債也無嫌

三

不爲清時好罷官扁舟一出興應闌却將妻女衝風  
雪笑殺旁人冷眼看

九日招靳李二孝廉飲王氏園

紅樹青烟返照沉  
黃花烏帽醉斜深  
乾坤不盡悲秋淚  
兄弟應同望遠心  
小閣壺觴催急管  
孤城霜露落哀砧  
登高一嘯烏棲夜  
山月微茫白滿林

九月望夕靳李兩孝廉招飲橫波寺遂乘月泝

舟洛水至中夜旣愜神曠爰及賦詠

山月古寺靜雁來天地清  
杯觴愜遠眺風迴秋湍鳴  
簫鼓競森爽謳歌遺世情  
孤舟激淺岸曠然涼思生  
宿霧發蒹葭夜烏定復驚  
零露濡玉珮踈星墮高城  
歡極倚胡床如欲舉金莖  
仰慙古人達眷焉軫合并  
倘况惜奄忽聊歌升天行

奉酬王給諫尋山至盧氏相遲不至宿行香寺

二首

秦洛秋雲外輕輶萬里看  
羊腸霜徑久熊耳雪峯寒  
竹宇斜風滿松堦細月闌  
追歡轉愁寂自古聚星難

二

潘生憐太拙汲黯幾時還  
會合真難偶行藏自不關  
鳳池依北斗雁陣過西山  
也分投簪去南游庶重攀  
陝州道中有懷渾令陳少巖

石徑逶迤萬壑分驅車高轉接烏羣黃河忽隱中條  
雪洛浦遙飛太華雲苦戀君恩猶叱馭久亡臣質  
罷操斤峭函千古經過地紅葉飄霜帶夕曛

積雨雪

秋旱冬轉陰雨雪亦乘除其始維甲子冷凍固有餘  
野鴟蹲屋角啼號塞寒廬隱几對松栢同雲隱丘墟  
炭爐比兼金而又無宿儲歲歛多哀慘卽事信欻歔  
歸裝夙自緘爛熳攤琴書奈何勤遠道盡室不相於  
浮生信淹薄願濟備衣袷日夕睹倦鳥翻飛求厥初

北征望恒碣東逝指孟諸念彼行路難遲暮獨安如

倚蘭堂歌爲李孝廉作

山何峩峩水洋洋空谷之中蘭有香讀書研露動葉  
几鳴琴洩雲生曲房光風暗轉人得知臭味之友同  
襟期牽綫索繩集芳佩蘭乎采折當及時國香不合  
生在野安得驟裊徃致之貢置王者乃所宜高子名  
此堂亦復爲其歌試廻孝廉船朝夕屢經過同心自  
昔聞如此相視而笑當如何

閒題雜畫

二 漁子束青篲孤帆江樹浦驚濤捲白龍風定天將雨

三 葫蘆貯天地那曉其中意借問三閭醒何如一擔醉

四 補衲織雲破緡經費日長坐深鐘磬寂天外送幽香

五 風動秋草肥胡天雁不飛醉夷羣解辯還起射鵰歸

六 霜樹落萬點山村散秋社醉翁無人扶獨語倒騎馬

七 山從寺中出帆向日邊迴只恐驚鷗鳥江扉不敢開

八 小艇桃花口秋藤幕茅屋悵望不見人虛囁答空谷

九 春水漫江樹舟人搖舫去不愁浪掀天愁無沽酒處

十 尋山拾翠微朝旭上人衣燕子歸新雨銜泥來往飛

小波白蘋渚細雨黃蘆岸宿有幽人期憑欄向天畔  
十一

春浦船船月春林岸岸花不知迷客渡何處覓人家  
十二

漁樵憑細語得失有誰聽風月頗相敵惟應爭醉醒  
謁取清惠文恪世德祠

世德馨香繫遠思瞻依愜嘆儼靈帷霜容寂歷松杉  
動風物淒清日月垂後代廟祠勤俎豆百年文獻足  
書詩我來如見公侯始孫子振振又一時

將上 計北首留別盧氏吏民作轍東行

三載又客吏山水爲弟兄好茲樸直俗野鹿亦其情  
車轍遄東邁計吏偕北征內循名實而俯慙教化成  
謬叨過升斗尸素良自驚業甘殿課罰百姓未盡明  
劉寵聞辭錢時苗犢哀鳴紛紜兒婦女竹馬羣遮迎  
苦愬明府仁室家始完丁今茲去簡書割慈舍孺嬰  
予曷力之有饑渴易爲生要譽則豈敢淳朴答忠誠  
把衣抱馬脚痛哭反無聲寒石軼我輪衰葉洒我衡  
草拂道周霜短日瘦光晶回首熊耳峯天半隱崢嶸

眷眷如故鄉切切語黎氓有暇勿造庭有事勿廢耕  
我將隱海曲暫爾急王程蒼黃一以別浮雲天地橫  
北風吹河干零淚濕冠纓

聞量移南戶曹志感

晚遷非不達得寵已如驚日月新除目衣冠逐世情  
白門雙眼冷青歲二毛輕松菊三年約歸欣盡室行  
宿白沙鎮

野色埋青雪寒雲似白沙烏棲驚暮景狗吠覺人家  
伊洛波瀾濶秦韓戰鬪賒百年半行役慘淡混龍蛇

風穴寺

遠峯迎馬首依依如故山冬深松栢翠妙水凝半環  
崧高拱秀色風鐸殷珊珊平臺留好月芳泉想潺湲  
獨游行役間振衣遂一閑汝墳縈曠漠雲樹莽且斑  
寥聞性命理悟之在往還怊悵北風涼杖屨難重攀  
三過二室留別

三載頻看二室松風塵杖屨那從容翠巖石隱前賢  
跡黃蓋雲生歷代封雪樹迥懸平樂澗雨花遙落少  
林鐘異時箕頰還相憶悵望中原六十峯

又作示傅元鼎

勞勞行色笑遷官積素蒼茫嶽影寒地主若爲愁判  
袂山靈真欲惱彈冠鴻邊千里從茲遠馬首羣峯不  
好看西北浮雲休苦望相思頻折穎陰蘭

別傅元鼎三首

嵩高浮白日北風天地涼翳翳黃蓋峯執手臨其陽  
晤笑一室內頃刻成蒼黃行子顧匹儔飛鳥迴且翔  
馬嘶人無轂穎水不可航吾子揚芬秀余其歸故鄉  
路岐從此始沾洒征衣裳

二

衣裳奈天風伊洛揚廣瀾贈我西方綺輕毳可禦寒  
相思南國深願寄江之蘭嵩石秀菖蒲可以助加餐  
各慎千金體默默兩無言志士聊慷慨且復崇令顏

三

令顏誰不觀傾城入宮忌樂哉有新知內顧傷憔悴  
中夜忽忘寢思惟子同被恩愛誓虧隔沒齒慎失墜  
豈不念風波難爲他人媚與子相代興快爾千秋事  
北風雪霰零蒼然自酸鼻鴻雁東南飛時寄一掬淚

密縣天僊宮白松傳黃帝葬三僊女其下

玉樹孤懸萬古標連枝轟轟黨雲霄瑤華不共秋霜  
老粉黛還疑夜月銷鶴影虛無聞振佩鳳聲縹緲接  
吹簫靈根欲闕天香異時逐三花仔細飄

二

蔥瓏霜幹倚天陰日月扶搖自古今春事不關冰雪  
質朝來那繫雨雲心步虛聲逐光風轉仙掌寒生白  
露深擬向萬年枝上望佳期阻絕待青禽

蓬水泉在白松南十餘武

石壁嶄巖垂下深百泉滴瀝饒清音或疑乳竇出天  
女忽有雲氣生朝陰仇池杳矣不可見洞口宛然傳  
至今苦恨纓塵復一濯眼穿天地傷予心

汴上喜逢鄭用章使君却贈

牢落東西嘆去來欣逢一接故人杯已輸肝膽班荆  
語却羨文章授簡才千古雲飛侯監市中原雪落孝  
王臺蒼茫欲避冥鴻跡汴水隋花不盡哀

同鄭用章使君莫相忘行

有序

用章詩序云歲巳酉予自南中出守宋遇孩  
之于梁孩之又自梁遷南中去十載行徑大

畧相似有不勝臨岐之感焉賦莫相忘行以  
識別嗟乎余與用章名行相厲者十年憶河  
朔之游踪愴汴州之邂逅情不盡言意難申  
頌遂承斐然之作敢忘率爾之報匪競來美  
庶勗爾  
知云爾

吹臺鴻雁飛梁園蓬蒿雪一別星紀六落魄南北轍  
黃河晝夜東北趨冬風雨土日出血相逢黯黯不得  
語含笑微看弄玉玦少年肝膽若爲真每傾意氣一  
沾巾醉來大叫侯嬴塚相如枚叔爲何人昔也河朔  
吏豪俊驕陽春今也汴上客乾枯如波臣君來我去  
一交臂蒼然各灑楊朱淚魯女尚憐輾園葵莫謂癡

人憂天墜古稱共理二千石豈是功名不得意十年  
余始離民社冗從之署真疣贅吁嗟乎男兒生不報  
國死卽休大者岳牧乃分憂其細但食太倉米罄折  
束帶同督郵漢庭黃金大於斗潁川渤海治最優  
天子虛席待長者齷齪羞殺平津侯余則無賴陸沉  
耳朝多闕事狂生耻鈞陳蒼茫九萬里狺狺虎豹塞  
天紀舉頭扣闥且復止丈夫要當猛抽身不然礎斧  
生不悔眼前所見吾與爾南北遙遙彼一方芒碭雲  
寒江漢長風塵千古莫相忘

閃允修在告還滇至新鄭擬命駕過訪余於盧氏不果貽詩五章詞旨悽愴極傷離之致聊如數約畧奉答却不能寄以須他日

春仲辭京邑十月歲行晚避暑弭郊圻將母勸加飯  
霜露秋序悽鞍馬從此遠黃雲翳皦日萬里游子返  
涉溱臨具茨遙望崆峒阪誰言河洛廣未濟終偃蹇  
行行又何陳江漢一歸人

二

憶昔尺素書吾子有報章上言戒僕夫下言過洛陽  
涉夏旣徂秋怨彼天河長預思會面日顛倒征衣裳  
巢燕辭我舍朔雁嗽且翔忽爾枉德音惟有詩百行  
行行可當哭字字熱肝腸之子長南矣萬里天一方  
驚定氣復結零淚懷內傷

三

不聞范巨卿千里待故人維子實不信虛託奉慈親  
歔歔各畏人謠詠本易嗔而我肝膽跡讒口不無因  
古賢亦有言萬里猶比隣南浮湘漢迥東逝滄溟津  
嘉譽尚夙夜大業幾日新中願儻克諧足用慰酸辛

四

景室鬱崔嵬積雪何峩峩  
莽互襄城野日暮慎經過  
壯游遠益豪或亦弔汨羅  
儻從舜蒼梧痛哭陳九歌  
天南稀驛使莫折隴頭花  
悄悄長路心相思復如何

五

北邙西風起紅葉不可掃  
黃河下千里驚沙覆白草  
懷哉客游子還家胡不早  
迷陽巨岐術狐狸跳中道  
楓青江湛湛蒼茫時物老  
念子盡室行庶幾顏色好  
歲暮多風濤舟航慎自保  
吾亦欲東還雲氣餐瑤島

避名如避仇居安以爲寶  
初憚兩心知昭監在青昊

發盧氏留別士民

冬深霜轍淨短日繫寒林  
離別千夫淚攀援一日心  
壺簞那可醉車馬孰能任  
忍聽南賓雁雲天送怨音

二

惜別淚滂沱空山豈重過  
相思深洛水將送過黃河  
葉縣僊從遠桐鄉愛獨多  
孤城回首處萬嶺雪嵯峨

盧隱集卷六 終

圖



